

**RAPORTU DI U SGIÒ PRESIDENTE
DI U CUNSIGLIU ESECUTIVU DI CORSICA****OGETTU : Cambiamentu di denominazione di e strade naziunale in Corsica**

U presente raportu à cum'è ogettu d'infurmà l'Assemblea di Corsica nantu à l'avanzamentu di u cartulare relativu à u cambiamentu di denominazione di e strade naziunale in Corsica.

Cuntestu

E strade naziunale sò state trasferite à a Cullettività Territoriale di Corsica cù a lege di u 13 di maghju di u 1991 purtendu statutu particolare di a Corsica. Hè statu effettuatu stu trasferimentu u 1^u di ghjennaghju di u 1993.

In a messa in opara di sta cumpetenza nova , l'Assemblea di Corsica hà sempre indiatu mezi impurtanti da mudernizà è accunccià a rete stradale territoriale in a pruspettiva di u sviluppu di l'ecunomia isulana. Sta voluntà si hè tradutta cù l'adopru di u schema direttore di l'investiscimenti stradali à dece anni, u 23 di ghjugnu di u 2011.

À st'occasione , hè statu decisu dinù di cambià a denominazione di l'itinerarii in « strade territoriale ».

Hè cusì chì pè a rete principale :

- l'assu Borgu – Bonifaziu, a N 198 diventerà a T 10 ;
- l'assu Aiacciu – Bastia, a N 193 diventerà a T 20 ;
- l'assu Morosaglia (Ponte-Leccia) – Calvi, la N 197 diventerà a T 30 ;
- l'assu Aiacciu – Bonifaziu, a N 196 diventerà a T 40 ;
- l'assu Corti – Aleria, la N 200 diventerà a T 50.

Cunteni di u prugettu

A carta in appicciumu à u presente raportu precisa l'inseme di u prugettu è u dettagli di e numerutazione nove di e strade territoriale.

I numeri à dui sciffri saranu affettati à l'assi principali mentre i numeri à trè sciffri saranu attaccati à e vie in attesa d'un sclassamentu à una'antra cullettività.

Misure d'accompagnamentu

Stu cambiamentu di denominazione di e strade di a Cullettività Territoriale di Corsica sarà accompagnatu di e misure seguente :

- sustituzione di u culore rossu attribuitu à i quatri di a signaletica direziunale è a e borne di a rete naziunale cù u turchinu di cyan,
- aghjustu di u logo di a Cullettività Territoriale di Corsica nantu à a parte bianca di e borne chilometriche in cunfurmità cù a macchetta quì aghjunta è nantu à l'inseme di i veiculi affettati à u mantenimentu è à a spluttera di e strade in complementu d'un dispositivu culuritu d'identificazione in corsu di definizione,
- ridefinizione di e strade territoriale à classificà strade à grande circolazione in virtù di u Codice di a Strada,
- ripresa cumpletà di a delimitazione in PR,
- infurmazione di i produttori di cartugrafia pè messa à ghjornu.

D'altronde , una lettera sullicitendu un avisu nantu à iste dispusizione hè stata indirizzata à u Sgiò Delegatu Interministeriale à a Sicurezza Stradale di u Ministeru di l'Internu.

Calendariu

Essendu datu u tempu necessariu per mette in opara l'inseme di e misure quì sottu, si hè prupostu di ritene a data di u 1^u di ghjennaghju di u 2014 pè operà stu cambiamentu di denominazione di e strade.